

Judas Cartacuśhan

Cay cartacta Jesuspa śhullcan Judasmi isquirbila waquincuna mana allin yačhachicucunacta yačhachicuyaptin: “Dios maynu cuyacuyniyu llaquipayniyu cayaptin’a ima mana allin chalaśhanchictapis lulachwanmá” nil. Chaymi Judas niycun chay yačhachicucunaca maynu pantášha capäcuśhanta. Jinamanmi chalapacücunäta anyala chay chalapacuśhallanču sumäpa tacyaycälinanpä.

¹Ya’a Judas Jesuspa nunan, Jacobop śhullcanmi isquirbiycamuc Tayta Dios cuyapäcuśhuśhayquicunäman, ayapäcuśhuśhayquicunäman, Jesusninchicpa licaycälisuśhayquicunäman. ²Llaquipayninpita jawca cawsaywan cuyacuy amcunaču caycuchun.

Waquincunam articunacta yačhachin

³Cuyaśhácuna, chalapacuyninchicpita uchuyllactapis sumäta tantialpälichinacpä isquirbimuyipi maynümi wañupaculá. Ñatac cananmi ichá prisisan isquirbiycamuná, chay Tayta Diosninchic allaycuyninpi wiñaypä uycamäśhanchic chalapacuyninchicpi lüchanacul jicutaycälinacpä. ⁴Waquin nunacunam ya’anchicman mana tantiachillal śhaticacälälimun. Chaycuná Tayta Diosta manamá manchaculcanchu “Dios maynu cuyacuyniyu llaquipayniyu cayaptin’a ima mana allin chalaśhanchictapis lulachwanmá” nil. Chaynüpam ipanchapäcun Duyñunchic japallan puydi Jesusninchicta. Paycuná unaypipis unanchášha mučhucäpämi cayalcan.

⁵Masqui yačhapäcuptiquipis, má, yalpalcachishayqui: Tayta Dios Egiptopita Israel lluy malcanta julayämulpis, mana tacyaycü chalapacücunätá lluy mari camacaycüla. ⁶Chaynütacmi allin caycuy-nintapis, lulaynintapis, munaynintapis cačhaycü anjilcunäta quiquin Tayta Dios yanawwayä tutapäcäču wiñay simripä čhänalayächin mučhucachinan muyuncäcama. ⁷Chaynütacmi Sodomawan Gomorra malcacunaca, jinaman muyülininču malcacunäpis lluy imaymana anla lulaycunaman muyucalcälil millachicuy juchacunacta lulayču jicutapäcula. Chaymi wiñay simpri nina walä ñacaycäwan mučhucay-

chishanca licachipä caycun chaynüchu mana allin nunacunaca ñacananpä.

⁸Chaynu captinpis cay shaticacamücunaca muspapacuyninwanmi quiquinta millachicuymán muyuchicun, llapa puydicunactapis jamuyayan, ashta janay pachächu sumä munayniyücunätapis jalutacuyanlä canpis. ⁹Licapäcuy-ari ashta puydi anjil Miguelpis wañüsha Moiseschu chay Satanašha mičhacuptin manam uchuyllapis ruydupaycunanpä calachu, sinu'a "iDiosña anwan licacuchun!" nila jinallam. ¹⁰Cay nunacunañatacmi ichá mana tantiapäcushancunätä ruydupäcun, jamuyapäcun. Lisipäcushancunaču'a, mana tantiayniyu uywa-yupaypis quiquin aychanta pampaman muyuchicunanpämi lulay-lulay capäcun.

¹¹iImanuylä capäcun'a! iCainpa^a lašhčhunmanmi jaluyalcan! iBalaamnuy^b illaypi wañuyninwanmi juc-läduman liyalcan! iCorë-yupay^c cuntran šalacuyninwanmi wañuyalcan!

¹²Chaycunam cumbidu lulapäcushayquicunächu mana allinman muyuchicunaca cayalcan mana pin'acuycul lacsayninwan upyayninwan; quiquillanta licacü michicunam. Pucutay yanalpamul mana tamyamücänümi cayalcan; cusichaču mana wayuyniyu lantanümi; sapipi chutäsha, chaquisha, ishca cuti wañüshalämi cayalcanpis. ¹³Lamarcäpa sumä-sumä ulunpalcul wicapacamušhannümi chay anla pin'ay lulaynincuna pushumacamun. Chaynütacmi cayninpita uyllur palpücänuy wiñaypä tutapäcächu pasanán cayán. ¹⁴⁻¹⁵Chay nunacunapitam Adanpi ančhish atinin Enocpis nila: "Licay, jinantin nunacunäta cäraycunanpämi Taytanchic shamun'a sumä nisyu-nisyu chuya anjilnincunawan. Chay mana allin nunacunätañatacmi chay imaymana mana allin lulašhancunapi, chay anla shiminwan payta palašhancunapi cäraycun'a" nil.

¹⁶Cay nunacunaca jamuyaycunallactam, quijacucunallactam, aychanpa munayllanta lulaypimi wañupaculcan. Limalpis nunatucuyllanwanmi, alawalpis prubichayllanwanmi imactapis lulapäcun.

Chalapacucunäta limapaycun

¹⁷⁻¹⁸Amcunañatac cayašhacuna, Jesusninchicpa puydi cačhancuna umayquiman čhulapäcunayquiñam "Camacay timpucunačhümi licalin'a jamurishcuna quiquinpa anla munayllanta lulaštín" nil nipäcushušhayquita. ¹⁹Paycunamari laquinacachipäcushüniquicunaca. Aychanpa munayllanwan aysachicüsha cawsayalcalmi Chuya Ispirítup munayninmannüchu mana cawsapäcun.

^a 11 Cain: Gn 4.3-9. ^b 11 Balaam: Nm 22.4-35. ^c 11 Coré: Nm 16.1-35.

²⁰Amcunañatacmi ichá, cuyaśhácuna, ama-pacha nishanchic chalapacuyninchicchu masísu wiñaycäliy Chuya Ispiritup yanapayninwan mañacúshtin. ²¹Chaynülla Diospa cuyacuyninchu cawsaycäliy Jesusninchic llaquipayninwan wiñay simpri cawsaycäman yaycayca-chimänanchic-cama alcaśhtin.

²²Ñatac ishcayyäśha cäcunätä tuquillap tantiaycälichiy.

²³Waquincunactá nina waläcäman linanpi julaycälil salbaycäliy. Waquinnincunactá llaquipaycunayquim. Ñatac cuydacunayquim chay mana allin lulaynincunawan aysachicunayquipi; aśhta chaywan anläśha müdanancunactapis éhinayquilämi canpis.

Taytanchicta alawaycun

²⁴⁻²⁵¡Chayurá, palpunayquipi licaycuśhüniqui, mana anlaycuśhacta sumä cushisha quiquinman puśhaycuśhüniqui Salbaycüninchic rasun japallan Tayta Diosllanchic-ari sumä-sumä altuman juluycuśha cachun! ¡Jinaman Jesusninchicwan-ari sumä cayninpis, altuman juluycuśha cayninpis, llapa munayninpis, gubirnuninpis, unaypis, cananpis, śhamücunächüpis, imaycamapis payllapä caycuchun! Chaynu cachun.